



Sarajevo, 30.08.2013. godine

Informacija o realizaciji ljetovanja na Boračkom jezeru u 2013. godini

Ljetovanje na Boračkom jezeru, u saradnji s Odredom izviđača „Neretva“ Konjic, realizovano je sa 222 učesnika iz Goražda, Sarajeva, Visokog, Fojnice, Vareša, Viteza, Tuzle, Njemačke i Konjica, u dvije smjene, od 08 do 22. jula 2013. godine.

Tokom ljetovanja planski su realizirani slijedeći sadržaji:

- **Edukativni:** Preventivne mjere prilikom boravka u prirodi, Prva pomoć u prirodi, Reproaktivno zdravlje djece i mladih, Značaj ekologije u savremenom društvu, Orijentacija u prirodi, Borba protiv trgovine ljudima, Upravljanje ličnim budžetom, Školovanje u Americi, te 5 testova o poznavanju BiH, Udruženja „Obrazovanje gradi BiH“, historije i jedan finalni test.
- **Sportsko-rekreativni:** Kvalifikaciona i finalna takmičenja u malom nogometu i odbojci na pijesku, i prijepodnevi i popodnevni boravak na plaži.
- **Zabavni:** Disko večeri, Radionica Forum teatar, Izbor miss i mistera kampa uz prigodan program, i proglašenje najuspješnijih sportskih ekipa i pojedinaca.
- **Društveni:** Na primjeren način obilježen je 11. juli - Evropski dan sjećanja na genocid u Srebrenici, a jednom broju učesnika omogućeno je obavljanje vjerskih obaveza za vrijeme mjeseca Ramazana.

Tokom ljetovanja nije bilo težih povrijeđivanja i oboljenja, radilo se uglavnom o ogrebotinama, ubodu insekata, blažim oblicima upala i blagim povećanjima tjelesne temperature pri čemu je pravovremeno pružena odgovarajuća pomoć.

Štab ljetovanja u cjelosti je izvršio funkcionalne obaveze i odgovornosti što je doprinijelo odgovornom ponašanju učesnika ljetovanja a naročito zalaganje, uz svakodnevno veliko opterećenje, ispoljile su kuharice.

Tokom ljetovanja načelnik Štaba ljetovanja dodijelio je slijedeće stimulatívne mjere:

- Pred strojem je pohvaljeno 45 učesnika
- U vidu nagrada uručeno je 7 knjiga
- Vođama grupa uručeno je 10 zahvalnica
- Za uspjehe na sportskim takmičenjima uručena je 21 diploma
- Za uređenje šatora uručene su 62 simbolične nagrade
- Za pronađene stvari, uglavnom mobiteli, uručene su 4 nagrade
- U obje smjene zahvalnice i knjige uručio je Jovan Divjak, izvršni direktor Udruženja.

U drugoj smjeni, učesnicima iz Udruženja „Obrazovanje gradi BiH“, načelnik Štaba ljetovanja izrekao je 2 javne opomene pred strojem.



Podatak da su učesnici ljetovanja iz Udruženja „Obrazovanje gradi BiH“ bili zastupljeni sa oko 20 % ukazuje na nedovoljan interes stipendista za ljetovanje na Boračkom jezeru. Pored nedovoljne zainteresiranosti za ljetovanje na Boračkom jezeru, ponašanje članova Udruženja u pogledu discipline nije bilo na nivou renomea Udruženja.

Uz primjernu disciplinu, naročito zalaganje u realizaciji edukativnih sadržaja ispoljili su volonteri Crvenog krsta/križa Općine Novo Sarajevo, s preporukom Štaba ljetovanja za nastavak saradnje u narednom periodu.

Troškovi ljetovanja u iznosu 28.618 KM podmireni su sredstvima stranih i domaćih donatora u novcu i robama, sredstvima Udruženja, projektnim aktivnostima, participacijom organizacija/ustanova izvan strukture Udruženja i oslobađanjem obaveze plaćanja boravišne takse od Turističke zajednice HNK, Podružnica Konjic-Jablanica.

Zaključci:

- Opći i posebni ciljevi ljetovanja ostvareni su u visokom stepenu, prema Okvirnom planu ljetovanja, čemu su doprinijele pravovremene pripreme i uspješno rukovođenje.
- Smještaj i ishrana su bili na nivou koji je zadovoljio standarde boravka u prirodi.
- Uspješno su realizirani edukativni, sportsko-rekreativni i zabavni sadržaji.
- Nisu zabilježeni teži oblici povrijeđivanja i nediscipline.
- Učesnici su anketiranjem dali visoke ocjene o kvalitetu ljetovanja i izrazili želju za učešćem u 2014. godini.

Prijedlozi:

- Ostvariti selektivan pristup izboru učesnika iz Udruženja „Obrazovanje gradi BiH“, naročito u vezi discipline i odgovornosti za izvršavanje obaveze dežurstva u kampu.
- Pismenim putem izraziti zahvalnost organizacijama/ustanovama koja brinu o korisnicima s posebnim potrebama, Općinskoj organizaciji crvenog krsta Novo Sarajevo, Odredu izviđača „Neretva“ Konjic i donatorima.
- Nastaviti saradnju sa OOCK Novo Sarajevo i za eventualno naredno ljetovanje osigurati tlakomjer i toplomjer.
- Zadržati i unaprijediti saradnju sa Odredom izviđača „Neretva“ Konjic.

INFORMACIJU SAČINIO

Mehmed Agić